

ნესტან სულავა

გალაკტიონის ვარდთმეტყველება*

ვარდის მხატვრულ გააზრებას უმნიშვნელოვანესი ადგილი უჭირავს მცენარეთა მითოპოეტურ სახეებს შორის, ამიტომ ყოველი ღიდი შემოქმედის მხატვრულ-სააზროვნო სისტემაში ვარდს, როგორც შედარებას, როგორც ეპითეტს, მეტაფორას, სიმბოლოს და ალევორიული გამოხატვის საშუალებას, განსაკუთრებული დატვირთვა აკისრია. იგი უხსოვარი დროიდან შემოდის მითოსში, ზნე-ჩვეულებებში, პოეზიაში. უძველეს დროში ვარდს სიხარული და მსიარულება უკავშირდებოდა, შემდეგ კი საიდუმლოს, იღუმალების (ლათ. sub rosa), სიყვარულის გამოხატვის ფუნქციაც შეითავსა.

სიმბოლოთა ენციკლოპედიებსა და ლექსიკონებში ვარდს ურთიერთსაპირისპირო მნიშვნელობის სიმბოლოდ განმარტავენ. იგი გამოხატავს სილამაზეს, მშვენიერებას, სრულყოფილებას, დიდებულებას, სიხარულს, სიყვარულს, კმაყოფილებას, დიდებას, ხობტა-ქებას, ღვთაებრიობას, ჰაერონებას, სურნელებას, სიამაყეს, ლოცვას, სიბრძნეს, მედიტაციას, საიდუმლოს, იღუმალებას, სიმშვიდეს, უმანკობას, სიწმინდეს, ვნებას, დაღვრილ სისხლს, წამებას, სიკვდილს, აღორძინებას, წარმავლობას, ცვალებადობას.

როგორც ხედავთ, ვარდის სიმბოლური საექტრი ერთობ მრავალფეროვანია.

მხატვრულ აზროვნებაში ვარდი ძირითადად მაინც მიჯნურს, სატრფოს უკავშირდება, მის გარეგნობას, ყველა იმ სულიერ განცდას ასახავს, რაც სიყვარულთან მიგვაახლებს: სიყვარულით გამოწვეულ სიხარულსა და ვნებას, გრძნობის მუდმივობას ან წარმავლობას, გრძნობისავე ცვალებადობას, თვით მიჯნურთა სიმორცხვესა და თავმოწონებას, სიამაყეს, სიმკაცრეს, მიუკარებლობას. მნიშვნელობა ენიჭება ვარდის ფერს, ფურცლებს, ფორმას.

ვარდის მეტაფორულმა და სიმბოლურმა გააზრებამ მოიცვა ყველა დროისა და ყველა ქვეყნის მხატვრული ლიტერატურა. ქართულ მწერლობაში, ისევე როგორც ფოლკლორში, ვარდის სიმბოლიკამ უმნიშვნელოვანესი ადგილი დაიკავა, მაგრამ განსაკუთრებულია ვარდის მეტაფორა, სიმბოლიკა და ალევორია „ვეფხისტყაოსანში“, რომელშიც ირეკლება წინარე მითოლოგიური, ფოლკლორული, რელიგიური თუ ლიტერატურული ტრადიციები და რომელიც მომდევნო ხანის ქართული პოეზიისათვის თავად გვევლინება ამოურწყავ საუნჯედ. ვარდის რუსთველური მეტაფორის, სიმბოლურობისა და ალევორიულობის უღრმესი შრეები ჩინებულად შეიგრძნო გალაკტიონ ტაბიძემ

* ფრაგმენტი ნაშრომიდან „რუსთაველი და გალაკტიონი“

და განაცხადა:

რუსთაველს მარად შეენოდა ვარდი -
ისეთი ქონდა ვარდს შინაარსი.
(„ვარდები“)

ვარდის მხატვრული სახის რუსთველური რემინისცენციებით, ღრმა მეტაფორებით, სიმბოლოებითა და ალეგორიებით გაჯერებულ ლექსებში ვალაკტიონ ტაბიძე, რომელსაც „რუსთაველი ახსოვს ბაეში“ და რომლის რწმენითაც „ყველა სახელებში მხოლოდ რუსთაველი იხსნის განსაცდელით მრავალ საუკუნეს“, მოგვაგონებს „ვეფხისტყაოსნის“ პასაჟებს მის გმირთა რთულ, წინააღმდეგობებით აღსავსე სულიერ ცხოვრებას და მათ შინაგან სამყაროსთან მიგვაახლებს.

ვარდის მხატვრული სახე ვალაკტიონის ლირიკაში საოცრად მრავალფეროვნაა, წარმოსახული უთუჯაღვი და კონტრასტული ფერთა გამით, რომელიც მკითხველ-მსმენელის თვალსა და ყურს წამიერად კიდევ ერთხელ შეაჩერებს სამყაროს სიდიადეზე; ვალაკტიონ ტაბიძე უსაზღვროდ ღრმად სწვდება რუსთაველის პოეტურ სამყაროს, ესოდენ მახლობელსა და მშობლიურს, რომელმაც პოეტს მისთვის ურთულეს პირობებში შეაძლებინა არსებობის სიკეთისა და პარმონიის რწმენა.

ვალაკტიონ ტაბიძის პოეტურ შემკვიდრებაში, წინარე ლიტერატურული ტრადიციების კვალობაზე, ვარდი რამდენიმე მხატვრული ფუნქციით იტვირთება: 1. ვარდი - მხატვრული შედარება; 2. ვარდი - ეპითეტი; 3. ვარდი - მეტაფორა; 4. ვარდი - სიმბოლო; 5. ვარდი - ალეგორია.

1. ვარდი, როგორც მხატვრული შედარება, იშვიათი ფერადოვნებით შემოდის ვალაკტიონის ლირიკაში. იგი მშვენიერების, სილამაზის გამოხატულებაა და თვით პოეტის შინაგან სამყაროს, სულიერ მდგომარეობას გადმოგვცემს, შესადარებელი საგნის თვალწარმტაცი სახის, უმანკოებისა და სიწმინდის ასასახავად არის მოხმობილი. მაგალითად, ღიმილი შედარებული პირველი ვარდის სინაზესთან:

იგი შეენოდა - ნაზი, როგორც პირველი ვარდი
და მკვირცხლი, როგორც უდარდელი მაისის წვიმა.
(„მაისის ღამეს“)

2. ვალაკტიონის ლირიკა მდიდარია ვარდის ეპითეტებით: „პირველი ვარდი“, რომელიც სინაზის, სითბოს, სიყვარულის ხატებაა, „დაწყვეტილი ვარდები“, რომელიც სიცოცხლის წარმავლობისა და წუთისოფლის მარადმუდონოზის გამოხატულებაა; „კისფერი ვარდები“, რომელიც ნოვალისის ცისფერ ყვავილებს ეხმინება; „მომჯადოებელი ვარდი“, რომელიც მშვენიერი ქალის

სახელ ევლინება, „ვარდნი უნონი“, რომლებიც, ვინ იცის, „რამდენს მეტყველებენ“; „ჭაობის ვარდი“, რომელიც სამშობლოს ჭალაზე ფიქრობს; „ყვითელი ვარდი“, რომელიც სიმარტოვის, უსასოების მძაფრი განცდებით ავსებს ადამიანს; „მკრთალი ვარდები“, რომლებიც პოეტის სულის მიმოხრას უგდებენ ყურს; „ახალი ვარდი“, რომელიც მომხიბვლელობის, მშვენიერების, სიხარულის, სიყვარულის შეგრძნებებს ბადებს.

3. ვალაკტიონის ვარდთმეტყველებაში განსაკუთრებულად მაინც ვარდის მეტაფორული, სიმბოლური და ალეგორიული გააზრებებია. უპირველესად „სილაჟვარდე ანუ ვარდი სილაში“ უნდა გავიხსენოთ, რომელიც მრავალგზის ყოფილა განხილვის საგანი. მასში გამოყენებულია ურთულესი მეტაფორა ვარდისა: „როგორც ნაწვიმარ სილაში ვარდი“, რომელიც ყოვლადწმინდა ღვთისმშობელს უკავშირდება. ნაწვიმარ სილაში დაგდებული ვარდი, კონტექსტის მიხედვით, უღვთისმშობლოდ დარჩენილთა ღრმა სევდაზე, სულიერი სამშობლოსაკენ სწრაფვაზე მიანიშნებს, მაგრამ ჯერჯერობით ყველაფერი სიზმარია:

დედაო ღვთისაე, მზეო მარიამ!
როგორც ნაწვიმარ სილაში ვარდი,
ჩემი ცხოვრების გზა სიზმარია
და შორეული ცის სილაჟვარდე.

ამიტომაც ვალაკტიონის ლექსებში ვარდების ჭქობა და უსამშობლოობის, უღმერთობის, უღვთისმშობლობის თემები და განცდები ერთმანეთს ეჯაჭვებიან:

არ მეგონა, რომ როდისმე
დასჭკნებოდა ვარდი,
მე მეგონა - მაგნოლიებს
ვერ დაძლევათ დარდი...
არ მეგონა, არ მეგონა,
არ მეგონა, გულო,
თუ ამგვარი გახდებოდი,
ცივი, უმამულო.

(„არ მეგონა“)

4. ვალაკტიონის ცალკეულ ლირიკულ ნაწარმოებში წარმოსახული ვარდები ერთმანეთს უკავშირდებიან. აქ უნდა ვახსენოთ იშვიათი ინტერტექსტუალობით გამოჩენული ლექსი „ვარდები“, რომელიც ნათლად მიგვანიშნებს რუსთაველისა და ვალაკტიონის სულიერ-ინტელექტუალურ სიახლოვეზე. თითქოს ლექსის დასაწყისშივე ირეკლება ის ფეფხისტყაოსნური ჰარმონია, რომელიც ნესტან-დარეჯანის ქაჯეთის ციხიდან გამოსხნის შემდეგ მკვიდრდება:

მე, ზამთრისაგან ჯაჭვაწყვეტილი,
ნაცნობ ბალისკენ მივემართები,
სად ფერად უცხო, ყნოსვად კეთილი
ზამთარ და ზაფხულ ჰყვავის ვარდები...

ისეთი შთაბეჭდილება იქმნება, თითქოს დავით გურამიშვილის მსგავსად, გალაკტიონმა „ვეფხისტყაოსნის“ პოეტური კომენტარები შექმნა, როდესაც ზემოხსენებულ სტრიქონებს წერდა. გალაკტიონის ეს სიტყვები რუსთაველის ცნობილ სტროფს ეხმიანება და ზამთარ-ზაფხულ აყვავებული ვარდებით ავსილ ბაღში პოულობს სულიერ სისავსეს, სრულყოფილებას, შვებას:

ზამთარი ვარდსა გაახმობს, ფურცლები შთამოსცვივიან,
ზაფხულის მზისა სიახლე დასწევს, გვალვასა ჩივიან,
მაგრამ მას ზედა ბულბულნი ტურფასა ხმასა ყივიან, -
სიცხე სწევს, ყინვა დააზრობს, წყლულნი ორჯერვე სტკივიან.

დიდა ცდუნება „ვარდების“ სტრიქონებში საღვთო ალეგორიის დანახვისა. ლექსში ანტიკური და რენესანსის ეპოქების გენიათა ფეიერვერკული წარმოსახვები ვარდს უკავშირდება, ვარდის მხატვრული სახეა მთელი ლექსის თანამდევი და შემკვერელი. „მაისის ვარდი, სიცოცხლის ვარდი“, ან „ვარდებს ეკლიანს, ვარდებს უეკლოს“ დაკრავთ სურნელი ჰომეროსის, ჰესიოდეს, ანაკრონტის, ოვიდიუსის პოეზიისა, ბოტიჩელის, რაფაელის, ჯოტოს, ვან დეიკის, ლეონარდო და-ვინჩის ფერადოვანი პალიტრისა. მათი სულიერ-ინტელექტუალური მემკვიდრეობა გალაკტიონის მუდმივი თანამგზავრი და მაცოცხლებელია. თვით გალაკტიონი, უერცესი, ღრმა და ფართო თვალსაწიერით, საკაცობრიო შემოქმედებითი სამყაროს, მსოფლიო კულტურის ერთ უთვალსაწინოეს წარმომადგენლად გვესახება, რომელსაც მშობლიური ქართული კულტურა კვებავს და აცოცხლებს, რომელიც ისეთივე წმინდა და ფაქიზი სულისა იყო, „როგორც უწვიმარ რიფრაჟში ვარდი“. ლექსში გაკრთება ვარდის, როგორც „სილამაზისა და სინამდვილის“ სახებისა და დიალემის, „ელადის გემით“ დაფანტვის მოტივიც, რომელიც არგონავტების მითის ალუზიებსა და ასოციაციებს ბადებს; ოვიდიუსის პოეტური ხატის - ვარდთან ერთად ჭინჭრის ზრდის სიმბოლურობაც გამოსჭვივის, რომელიც ცნობილ რუსთაველურ სიბრძნეს მოგვაგონებს: „ვარდთა და ნეხვთა“... მაგრამ უმთავრესი ისაა, რაც ლექსის დედაზრად იკვეთება - მიახლება სიმალღებთან, რომელთაგან ერთი მწვერვალი რუსთაველია. რუსთაველის ვარდთმეტყველების არსი გალაკტიონისათვის არა მხოლოდ გასაგებია, არამედ ორგანულად აქვს შესისხლბორცვული და გათავისებული:



და ყველა ერთად: ცა, ზღვა, მთა
ჩვენი ველისა და წყალის -
ლექსია რუსთაველის და
გალაკტიონის საწყალის.

იხიბლებოდა სული დიადით,
როს სიმალღეებს სწვდებოდა არსი.
რუსთაველს მარად შვენოდა ვარდი -
ისეთი აქონდა ვარდს შინაარსი.

ლექსის მიხედვით, ყოველი ხსენებული შემოქმედი ვარდის სიმბოლოთი შემოდის გალაკტიონის პოეტურ სამყაროში, ისინი მონაცვლეობენ, რაც ცხოვრების წალკოტს მუდამ მშვენიერი ფერებით აცვაებულად წარმოაჩენს.

რუსთველური ვარდთმეტყველების ანარეკლი გამოსჭვივის გალაკტიონის შესანიშნავ ლექსში „დრო“:

სარკეთა სახეებს სანთლები მოედო
და შვენის რუსთაველს შირაზის ვარდები;
სიმღერის მხურვალე დრო არის, პოეტო,
თუ ასე წარმართი გზით წარემართები.

ქაოტურ სამყაროში გზის გაკვლევა ადვილი არ იყო შემოქმედისთვის, მაგრამ შველოდნენ ბუმბერაზ პოეტთა ნათელი სახეები, რომლებიც მის განცდებს ხვეწდნენ და ტკივილიან განწყობილებებს უამებდნენ. ამიტომ მიელტვოდა ნამდვილ ვარდებს და უტყუარი ალლოთი, შეუმცდარი ინტუიციით განასხვავებდა ხელოვნურისაგან:

ნამდვილ ვარდების გვერდით
სდგას ხელოვნური ვარდი,

თქვენ სივრცეებზე სწერდით,
როგორც ნამდვილი ბარდი.
(„ნამდვილი და ხელონური ყვაილები“)

ცნობილია, გალაკტიონ ტაბიძე ხშირად მიმართავდა რემინისცენციებს, ასოციაციებს. მის სახეობრივ სააზროვნო სისტემას თან სდევს „უზარმაზარი მსოფლიო ქნარის“ გამოცდილებანი, მაგრამ ყველაფერი ქართული სამყაროს საწვდომად უნდოდა იმ რწმენით, რომ „ადრე თუ გვიან სიცოცხლის ვარდი ბედნიერებად გადაიშლება“ („გრძნობათა ფერფლი“).

ვარდის ფერთამეტყველების უჩვეულო სიმდიდრეა გალაკტიონის პოეზიაში. „ვეფხისტყაოსანში“ ვარდის ფერი იშვიათად გაკრთება, გალაკტიონისთვის ვარდის ფერს განწყობილების, სულის მიმოხრის გამოხატვის ფუნქცია ეკისრება. სიკვდილის გზა ვარდისფრადაა შეფერილი და იგი მხოლოდ რჩეულთა ხვედრია:

თუ სიკვდილის სიახლოვე როგორ ასხვაფერებს
მომაკვდავი გედის ქანგთა ვარდებს და ჩანჩქერებს,
თუ როგორ ვგრძნობ, რომ სულისთვის, ამ ზღვამ რომ აღზარდა,
სიკვდილის გზა არრა არის, ვარდისფერ გზის გარდა,
რომ ამ გზაზე ზღაპარია მგოსანთ სითამამე...
(„მთაწმინდის მთვარე“)

გალაკტიონის ვარდები ხან წითელია, ხან სისხლისფერი, ხან ვარდისფერი, ხან ყვითელი, ხან ცისფერი... პოეტის „სამოთხის ვარდი“ („სიონის მტრედი“) ერთგვარად უპირისპირდება მისსავე „ჭაობის ვარდებს“ („შრიანებს ჩალა“) და „თოვლის ვარდებს“ („ხან უფსკრულები, ხან მწვერვალები“). „სამოთხის ვარდი“ ალეგორიულად აღსაქმელი ტროპია, რომელიც, ვფიქრობთ, ღვთისმშობელს უკავშირდება, რის საფუძველს ლექსის სახელწოდება იძლევა.

ვარდი სიმბოლურად გარესინამდვილის უსახურობის, დაუწმენდავი გარემოს, ქოტური სამყაროს პირობებში ან ფერგამკრთალია, ან საერთოდ გამქრალია, შეცვლილია.

შეხვედი მეგობარს: ვარდის ნაცვლად კუკური ბამბის
გულზე ბნეული, ჩვენი დროის თანამგრძნობია.
(„გავსდით ხანდაქს“)

ეს ახალი სამყაროს, ახალი ცხოვრების ტკივილიანი, მძაფრი განცდითა და წუხილით აღსავსე ხილვა და შეცნობა იყო, რასაც იშვიათ გულწრფელობას შჩვეული პოეტი ვერ მალავდა. საქართველოს ცხოვრებაში ხედავდა უფრო

მეტად ეკალს, იასა და ვარდს - ცოტას:

ქართლის ცხოვრება მძიმეა, ეკლიანია სავალი,
ცოტაა ია და ვარდი, დაბრკოლება კი - მრავალი.

ამიტომ ხშირად სდიოდა „ვარდს სისხლის ღვარი“ („ვარდი“), ხოლო ამ ცვალებადსა და სწრაფმავალ წუთისოფელში მგრძობიარე და მთრთოლვარე პოეტს სტკიოდა ქართული სული, მარად მებრძოლი და ამბოხებული.

გალაკტიონ ტაბიძეს ვარდმა თავისი საიდუმლოებები გაანდო, ვარდმა რუსთაველთან საოცრად ღრმა და ფაქიზი კავშირი დაამყარებინა, ვარდმა უნაზესი და უსათუთესი გრძნობები და განცდები მკითხველისათვის გააზიარებინა.

გალაკტიონის ვარდთმეტყველებას მუდმივად თან სდევს რუსთველური ალუზიები, ასოციაციები, პარადიგმები, რომლებიც მის პოეტურ შემოქმედებაში მხატვრულ სახეთა სრულიად ახლებურ შინაარსში გარდაისახა. რუსთველური სახეებით, სიმბოლოებითა და ალევორიებით შთაგონებული პოეტის უმდიდრეს მხატვრულ სამყაროში მხოლოდ ერთი, ვარდის მხატვრული სახისა და მისი ტროპული მეტამორფოზების ნაწილობრივი წარმოჩენაც კი თვალნათლივ ადასტურებს ქართულ ლიტერატურაში ტრადიციის უწყვეტობას. შოთა რუსთაველისა და გალაკტიონ ტაბიძის შემოქმედებითი შეხვედრები სიცოცხლის მარადიულობის, შემოქმედებითი ენერგიის უკვდავებისა და თავისუფლების დაუსრულებელი ჰიმნია.

